

中國古典文學基本叢書

中華書局

辛棄疾集編年箋注

第六冊

中國古典文學基本叢書

辛棄疾集編年箋注

第六冊

〔南宋〕辛棄疾 著
辛更儒 箋注

中華書局

辛棄疾集編年箋注附錄

附錄一 諸家贈酬及紀念詩

寄辛幼安二首 周孚

我屋與君室，濟南北北州。相逢楚天晚，却看蜀江流。老境渾能迫，妖氛竟未收。何時一塵地，歸種故園秋。（《蠹齋鉛刀編》卷九）

別去纔三月，人來已兩書。老懷多弛曠，厚意獨勤渠。共歎飄流際，能收謗罵餘。春風綠林壑，還佇短轅車。（同上）

寄辛滁州

周孚

江皋追送僅踰旬，節物俄驚一度新。西澗潮生還值雨，南山雪盡正逢春。遙知風韻如前輩，可有篇章憶故人？擬向瑯琊問幽事，兩翁遺徑未埃塵。（同上）

送辛幼安

周孚

西風掠面不勝塵，老欲從君自濯薰。兩意未成還忤俗，一饑相迫又離羣。只今參佐須孫楚，何日公卿屬范雲？節物關心那可別，斷紅疏綠正春分。（《蠹齋鉛刀編》卷一〇）

謝端硯辛滁州幼安

周孚

君家即墨君，不與世同調。紫雲覆寒冰，色與質俱妙。誰知窮荒地，尤物來越徼。探囊忽見畀，此事出吾料。隨珠暗投處，歎息真可弔。物生各有用，瑚璉薦清廟。君才兩漢

餘，妙句出長嘯。吾衰亦粗爾，老語世不要。摩挲冰玉質，自慶還自醮。願君爲追琢，勿令硯空笑。（《蠹齋鉛刀編》卷一一）

次韻贛州知府陳侍郎二首，前篇寄幼安，後篇寄季陵

周孚

乘輶西去定何人，驚倒吳儂政要君。平日比肩空絳灌，此行知己有華勛。不令殘孽終煩國，信是高才可冠軍。鋒猬斧螭當著語，病夫今歲懶於文。（錄一）（同上）

寄辛幼安

周孚

飛鳶跼跼瘴煙中，歎息渠儂仗已窮。欵壑老松真耐久，燎原荒草易成空。危機可畏渾如此，莊語能聽只有公。已識柴車勝朱轂，快來相就北窗風。（同上）

寄幼安

周孚

送君城西原，春水今鑿冰。兩州灌瓜地，一往竟未能。衡門閉青苔，欲語誰復應？招邀西飛鴻，因得問寢興。向時金華翁，與君嘗伏膺。清談尚尊俎，高標忽丘陵。梁木果爾摧，天理安可憑！吾儕鬼揶揄，可但世所憎。霜風拉枯桑，囑君護茵馮。我病比復加，日飯那得升。殘年卧閭巷，盛事望友朋。得見君奮飛，吾甘老薪蒸。（《蠹齋鉛刀編》卷一二）

夢與辛幼安遇於一精舍，予賦詩一篇，覺而記其卒章云：

「它年寄書處，當記盧仝窮。」因賦此詩寄之

周孚

秋霜草花落，夢君浮屠宮。羈魂得清游，短章見深衷。破屋仰見天，何人記盧仝？相逢大槐國，一笑仍匆匆。與君十年交，九年悲轉篷。君行牛斗南，我在淮漢東。修途繚山岳，此會何緣同！伏枕自歎息，衰懷託西風。啾啾籬間雀，冉冉天際鴻。擔簦亦何憾，

吾生自當窮。扁舟具簑笠，久已藏胸中。他年君來時，葦間尋此翁。（《蠹齋鉛刀編》卷一四）

聞辛幼安移漕京西

周孚

孤鴻茫茫暮天闊，問君章貢何時發？去年不得一字書，今日又看千里月。向來人物推此邦，至人不死惟老龐。請君剩釀蒲萄酒，爲君酌渠須百缸。（同上）

送辛殿撰自江西提刑移京西漕

羅願

峨峨鬱孤臺，下有十萬家。喧呼隘城闕，戀此明使車。憶公初來時，狂狡嘯以譁。主將失節度，玉音爲咨嗟。一朝出明郎，繡衣對高牙。持斧自天下，荒山走矛叉。光騰將星魄，枉矢失驚蛇。氛霧果盡廓，十州再桑麻。恩令撰中秘，天筆有褒嘉。辛氏世多賢，一姓古所誇。太史善箴闕，伊川知辭華。誰歟立軍門，杖節來要遮。亦有救折檻，叩頭當殿衙。英風雜文武，公獨可肩差。佩玦善斷割，揮毫絕紛葩。時時有縱舍，惠利亦已遐。

京西故畿甸，傍塞聞悲笳。明時資饋餉，豈減漢褒斜？勿云易使耳，重地控荆巴。三節萃一握，眷心良有加。古來居此人，愛國肯雄誇：羊祜保至信，陶公戒其奢。安邊有成略，此道未全賒。公今有才氣，功名安可涯。願低湖海豪，磨礪益無瑕。凌煙果何晚，猶有髮如鴉。（《鄂州小集》卷一）

題辛幼安稼軒詩

洪适

濟時方略滿心胸，卜築山城樂事重。豈是求田謀萬頃，聊因學圃問三農。高牙暫借藩維重，燕寢未須歸興濃。且爲君王開再造，他年植杖得從容。（《盤洲文集》卷七）

上辛安撫二十韻

許及之

開闢重華旦，胚胎間世賢。雲龍時際會，星鳳睹爭先。天授歸三傑，神謀效一編。宏謨驅固陋，餘論細雕鐫。詔旨傾臚甸，山呼動奏篇。干霄須造化，惟月進班聯。有客占星次，逢人問日邊。江湖煩鎮撫，壤地屈盤旋。談笑潢池淨，生成壁壘堅。丈夫真細事，餘

子敢差肩！黃屋深知切，青雲寵渥駢。即歸調鼎鉉，少駐斲龍泉。更治今馮翊，重歸舊潁川。載塗明積雪，嗣歲卜豐年。封殖棠陰盛，驩迎竹馬鮮。恩波行處足，威譽向來傳。此獨瘡痍甚，方疑雨露偏。禁通鄰邑粟，費減月椿錢。齋戒逾三日，遭逢有二天。執鞭吾所慕，負弩敢驅前！（《涉齋集》卷一三）

以歸來後與斯遠倡酬詩卷寄辛卿

趙蕃

人家饋歲何所爲，紛紛酒肉相攜持。我曹饋歲復何有，酬倡之詩十餘首。緘封寄槁玄英方，從人笑癡我自狂。狂餘更欲誰送似，咫尺知音稼軒是。公乎比復何所作，想亦高吟動清酌。賓朋雜選孰爲佳，咸推楊范工詞華。我曹所樂雖小技，歷古更今不能廢。歲云暮矣勿歎窮，梅花爛漫行春風。（《淳熙稿》卷五）

呈辛卿二首

趙蕃

詩老當年聚此州，邇來零落盡山丘。公雖暫爾淹時用，天豈特令繼夙遊？幽事儻多塵

事絕，靈山孰與博山優！林棲相去無百里，窈窕崎嶇可後不？（《淳熙稿》卷一五）

今昔名流幾許人？況於室邇更身親。南州行卷雖雲舊，東閣知名固若新。再見每懷風度遠，兩年空恨往來頻。其誰爲我談名姓？車轍勤公野水濱。蕃頃聞右揆稱公文章。（同上）

覆辛稼軒遊月巖

杜旂

霧覆蒙龍曉色新，半空依約認冰輪。婆娑弄影寒生露，中有釵橫鬢亂人。（光緒《蘭溪縣志》卷五）

送辛卿幼安帥閩

陳傅良

長才自昔恨平時，三人修門兩鬢絲。甕下可能長夜飲，花間却學晚唐詞。幼安詞妙一世，而詩句不傳傅良，恨事也。潛然北顧關河永，簡在西清日月遲。乘雁雙鳧滄海上，與君從此恐差

池。（《宋元詩會》卷四四）

文村道中

項安世

十五年前號畏途，祇今開闢盡田廬。分明總是辛卿賜，誰信兜鍪出袴襦？
辛卿名棄疾，前此帥荆，弭絕群盜。（《永樂大典》卷三五七九村字韻）

包山送辛大卿知福州

項安世

樓頭尊酒送將行，樓下江潮意未平。漠漠南于垂雨腳，陰陰長夏作秋聲。杜陵戀闕心應苦，楚客思君淚合傾。莫倚輕紅宜重碧，男兒報國在尊生。（《平庵悔稿》卷四）

送辛帥三山

韓滉

暫著鵷行却建牙，此身何地不爲家。閩山又作年時夢，吳會分明眼底花。舒卷壯懷公自

笑，往來行李士爭誇。棠陰應有邦人望，笳鼓西風擁帥華。（《澗泉集》卷一二）

昌甫分寄瓢泉，繼而辛卿遺一壺來，以詩爲謝

韓淲

章泉分餉瓢泉酒，已洗牢愁萬馬空。重拜書題如夏日，便開甕盎瀉春風。時聞水石雲山主，世數文章翰墨功。且道歲寒梅雪好，僧窗間有幾人同？（《澗泉集》卷一四）

辛卿有言：「雨則清潤，晴則清和。」昌甫因

爲五字韻呈之

韓淲

雅俗豈殊調，今古信一時。晴雨草木長，摸索皆我詩。善來子趙子，身世忽若遺。顧瞻絕代人，乘閑有幽期。和潤見名理，處處清風隨。坐卧泉亂鳴，孟夏涼侵肌。睡餘供茗事，禪榻鬢成絲。進退出處閑，何必玩易義？（《澗泉集》卷五）

寄懷章衢州辛越州

趙蕃

江東去江西，道阻而且長。懷我金石交，每瞻鴻雁行。信州去衢州，道阻而匪修。黃花逐九日，明月負中秋。江東去浙東，江表邈剡中。暮雲巖壑異，固有丘壑同。一出或一處，或默而或語。行步澀如棘，欲飛恨無羽。風高木已落，薄寒能中人。室邇人甚遠，不孤必有鄰。（《淳熙稿》卷一）

送辛幼安殿撰造朝

陸游

稼軒落筆凌鮑謝，退避聲名稱學稼。十年高卧不出門，參透南宗牧牛話。功名固是券內事，且葺園廬了婚嫁。千篇昌谷詩滿囊，萬卷鄴侯書插架。忽然起冠東諸侯，黃旗皂纛從天下。聖朝仄席意未快，尺一東來煩促駕。大材小用古所歎，管仲蕭何實流亞。天山掛旆或少須，先把銀河洗嵩華。中原麟鳳爭自奮，殘虜犬羊何足嚇。但令小試出緒餘，青史英豪可雄跨。古來立事戒輕發，往往讒夫出乘罅。深仇積憤在逆胡，不用追思灞亭

夜。（《劍南詩稿》卷五七）

正月二十七日，陪唐子蒼登卧龍，時稼軒已去，令人懷之

蘇洵

晴雨煙雲態，高深會見聞。亂山依越定，一水向吳分。元白諸侯表，楊王俊士群。春風到紅綠，花草總能文。（《泠然齋詩集》卷四）

答辛幼安

高似孫

青天不惜日，壯士偏知秋。自古有奇畫，如今空白頭。彼時當再來，吾老不可留。天推璧月上，星入銀河流。躔度若此急，人生與之浮。終夜自起舞，無人共登樓。典謨有陳言，河洛非故州。黃鶴呼不來，誰能理殘裘？（劉克莊《後村先生大全集》卷一八〇《詩話》續集）

呈稼軒

劉過

精神此老健於虎，紅頰白鬚雙眼青。
未可瓢泉便歸去，要將九鼎重朝廷。
閉門翹足觀山睡，松檜鬱然雲氣高。
說夢向人應不信，碧油幢下有旌旄。
書來賜以蘭溪酒，下視藩封奴僕之。
吾老尚能三百盞，一杯水不直吾詩。
卧龍人昔如龍起，鼎足魏吳如等閑。
若結梅花爲保社，林逋祇合住孤山。
書生不願黃金印，十萬提兵去戰場。
祇欲稼軒一題品，春風俠骨死猶香。
（《龍洲集》卷八）

呈徐侍郎兼寄辛幼安

劉過

狼臂將軍戰不休，當時部曲已封侯。
夜深忽夢燕山月，猶幸君王晚更收。
（其二）（同上）

梅，次稼軒香字韻

華岳

一年無處覓春光，杖策尋春特地忙。牆角數枝偏冷淡，江頭千樹欲昏黃。梢橫波面月搖影，花落樽前酒帶香。更仗西湖老居士，爲予收拾付詩囊。（《翠微南征錄》卷五）

不遇，次稼軒韻

華岳

英雄不遇勿長籲，苟遇風雲彼豈拘。不向關中效蕭相，便於江左作夷吾。當知晉霸非由晉，所謂虞亡豈在虞？多少英靈費河岳，鍾子不遇獨何歟！（同上）

春郊即事，次稼軒韻

華岳

東風吹動綺羅塵，翠蓋紅纓處處新。蝶翅拍開千樹雪，鶯聲催老十洲春。人生有酒須行樂，吏祿無階且食貧。歸客不須籠畫燭，醉看明月上雕輪。（同上）

答杜仲高，來書哭兄伯高及辛待制，且言杜氏自仲高始

預薦榜

項安世

康廬之麓蠡之皋，太息書生杜仲高。待制功名千古傑，賢良文字萬夫豪。淚痕頻向西風滴，場屋新隨舉子曹。且爲門闌辟青紫，軻親威父一生勞。（《平庵悔稿》卷四）

無題

韓滉

老覺賓朋日日稀，故家言語轉依違。百年以往自興廢，千古其間誰是非。江左風流徒可想，山東豪傑竟何歸。勾吳於越連閩嶠，瘴雨蠻煙百鳥飛。（《永樂大典》卷一二〇一七引《澗泉日記》）